

SOLICITÚ DE PROYECTU DE DISEÑU Y REALIZACIÓN DE CAMPUS DE BRANU Y NAVIDÁ 2022 EN LLABORAL CIUDÁ DE LA CULTURA

EL PROYECTU.

La Sociedá Pública de Xestión y Promoción Turística y Cultural del Principáu d'Asturies (d'equí p'arriba la SPXP) tien encomendada la xestión, ente otros equipamientos culturales de la rexón, de Llaboral Ciudá de la Cultura en Xixón, que tien ente los sos fines la prestación de toa clas de servicios y actividaes culturales.

Llaboral promueve un programa cultural y d'ociu que tien como finalidá (ente otros) ufiertar actividaes de calidá al públicu infantil y familiar, averando a la población al mundu de les artes dende les edaes más tempranes.

Por eso propónse esta solicitú de proyectos de Campus con un oxetivu doble: per un llau, ayudar a les families a conciliar en momentos vacacionales la so vida personal y llaboral al traviés d'esta actividá, y per otu, ufiertar a los/les más pequeños/es actividaes didáctiques y lúdiques onde puean disfrutar, deprender y rellacionase nun entornu seguru.

Pa cumplir estos oxetivos faise solicitú de proyectos pola que se va escoyer la propuesta que llogre meyor valoración, que va llevase a cabu nos periodos de branu y navidá 2022.

1.- OXETU DE LA CONVOCATORIA.

L'oxetu d'esta convocatoria ye la selección d'un proyectu de Campus (branu y navidá) y la so realización posterior nes instalaciones de Llaboral Ciudá de la Cultura.

El **Campus de Branu** va facese a lo llargo de 8 selmanes del branu del 2022, nos meses de xunetu y agostu, sacando la Selmana Grande de Xixón. Han diseñase delles sesiones temátiques con calter selmanal. Les xornaes han ufiertase nestos términos:

- El Campus va tar empobináu a neños/neñes de 3 a 12 años, estremaos por edaes nos tramos 3 a 5 años / 6 a 12 años. Pa participar nel Campus, los neños y neñes de 3 años han tar yá escolarizaos.
- Habrá facese en formatu selmanal (de llunes a vienres) nestes selmanes:
 - 4 a 8 xunetu 2022
 - 11 a 15 xunetu 2022
 - 18 a 22 xunetu 2022
 - 25 a 29 xunetu 2022
 - 1 a 5 agostu 2022
 - 15 a 19 agostu 2022 (*incluyendo'l festivu del 15 agostu*)
 - 22 a 26 agostu 2022
 - 29 agostu a 2 setiembre 2022

- Habrá ufiertase opción de **media xornada** (de 9:00 a 14:00 hores) o **xornada completa** (habrá especificase la propuesta d'horariu ampliáu, que como máximu va poder allargase hasta les 17:00 h).
Tocante a la comida de los/les participantes (nel casu de la xornada completa), esta xestión ha correr a cargu de la empresa axudicataria, quien va poder proponer la opción de catering o restauración que considere oportuna pela so parte.
Va valorase positivamente la opción de madrugadores (entrada anticipada primero de les 9:00 hores).

El **Campus de Navidá** va facese a lo llargo de 2 selmanes, quitando los festivos, coincidiendo col calendariu escolar pal periodu navidiegu 2022-2023. Van diseñase delles sesiones temátiques con calter diariu. Les xornaes van ufiertase nestos términos:

- Un solu rangü d'edá de 3 a 9 años. Pa participar nel Campus, los neños/es de 3 años han tar yá escolarizaos.
- Posibilidadá d'apuntase a díes sueltos o selmana completa (selmanes de 4 xornaes: selmana avientu / selmana xineru)
- Diariu, estos díes (**podría llegar a sufrir cambeos de fecha en función del calendariu escolar 2022-23*):
 - Martes 27 d'avientu 2022
 - Miércoles 28 d'avientu 2022
 - Xueves 29 d'avientu 2022
 - Vienres 30 d'avientu 2022
 - Martes 3 de xineru 2023
 - Miércoles 4 de xineru 2023
 - Xueves 5 de xineru 2023
- Xornada de 9.00 a 14.00 hores

Va valorase positivamente la opción de madrugadores (entrada anticipada primero de les 9:00 hores).

El resultáu económicu de l'actividá va ser pa la empresa axudicataria del proyectü, ensin intervenir la SPXP nesti sentíu.

La comisión aplicable pol usu del sistema de venta de entraes de Liberbank (pagos con datáfonu na taquilla y ventes online) habrá asumila l'axudicataria del Campus, descontándose esta de la cantidá a ingresar poles ventes de l'actividá.

Liberbank va tresferir a la empresa axudicataria la parte de la recaldación correspondiente a la venta electrónica (tarxeta de débitu/creitu y venta online), depués de descontar les comisiones de venta de cada canal y cualquier otra tasa o impuestu aplicable llegalmente, a mes vencíu nel casu del Campus de Branu y a selmana vencida nel casu del Campus de Navidá. La recaldación de les ventes d'efectivu ha entregase a la empresa axudicataria na fecha acordada ente les partes.

Llaboral Ciudá de la Cultura pel so llau apurre:

- Instalaciones pa desenvolver de les actividaes col montaxe y medios técnicos requeríos pa eso
- Promoción y difusión del Campus
- Serviciu d'información y venta d'entraes

- Canales de venta (Recepción de la Llaboral y venta online)

Con esta convocatoria establécense les bases y requisitos que van rexila, igual que'l procedimientu pa la selección del proyectu tocante a los principios de publicidá, concurrencia llibre y oxetividá.

2.- PUBLICACIÓN Y PUBLICIDÁ.

Esta convocatoria y bases, lo mesmo que la resolución del procedimientu, ha publicase na páxina web de Llaboral Ciudá de la Cultura: www.laboralciudadde lacultura.com y na páxina web d'Asturies Cultura en Rede: www.asturiesculturaenrede.es, ensin perxuiciu de los medios complementarios de difusión que la SPXP quiera usar.

3.- SOLICITANTES.

Van poder participar nesta convocatoria les persones físiques o xurídiques que desenvuelvan la so actividá principal n'ámbitu de la investigación o programación d'actividaes culturales, didáctiques, educatives y artístiques.

Los y les monitores que lleven a cabu l'actividá y tean en contactu colos grupos infantiles han presentar el Certificáu de Delitos de Naturaleza Sexual primero d'empezar el Campus.

4.- CARACTERÍSTIQUES DE LOS PROYECTOS PA CONCURRIR A ESTA CONVOCATORIA.

Les característiques qu'habrán tener y especificar les propuestas son estes:
Campus de Branu

- Descripción del programa d'actividades y horarios. El desenvolvimientu de les sesiones ha incluyir tiempos d'actividá y de récreu, estos últimos siempre supervisaos polos/es monitores.
- El desenvolvimientu temáticu de cada selmana ha ser asina:

Propónense 4 temátiques selmanales distintes que se repiten pa cubrir el total de les 8 selmanes (temática 1, temática 2, temática 3, temática 4, y otra vuelta temática 1...) con actividaes diverses vinculaes sobre manera a les artes plástiques y escéniques. Cada selmana temática ha tener un nome/títulu que la identifique.

- Van poder incluyise dientro del cuadrante d'actividaes visites guíaes a **Llaboral Ciudá de la Cultura**, ensin qu'esto suponga un costu más pal axudicatariu. Tamién van poder incluyise visites al **Xardín Botánicu Atlánticu**, por ser un equipamientu d'interés que s'alcuentra na redolada de Llaboral, ensin qu'esto suponga un costu más a la empresa axudicataria. La xestión d'estes visites va correr al cargu de la Llaboral de manera coordinada cola empresa axudicataria, en función de les restricciones vixentes y de la evolución de la pandemia.

- Nel desenvolvimientu del Campus d'esti branu tamién se busca que tengan un pesu específicu actividaes y/o procesos de trabayu con aplicación en **materia sostenible** col oxetivu de concienciar y sensibilizar a los participantes dende edaes tempranes en valores como'l respetu, la preservación y la puesta en valor de los recursos culturales. Nel programa del Campus pídese la integración d'actividaes sostenibles en materia social, ambiental y cultural.
- Además, con una frecuencia selmanal ha contemplase nel cronograma una actividá en **llingua asturiana**.

Campus de Navidá

- Descripción del programa d'actividades y horarios. El desenvolvimientu de les sesiones ha incluyir tiempos d'actividá y de recréu, estos últimos siempre supervisaos polos/es monitores.
- El desenvolvimientu temáticu de cada xornada ha ser asina:

Propónense 7 sesiones diaries distintes con actividaes diverses vinculaes a les artes plástiques y escéniques, desenvolvendo la creatividá y la imaxinación y cola Navidá como filu conductor, ensin dexar de llau la tradición cultural, los personaxes, l'averamientu a otres cultures y la música d'estes feches.

Cada xornada temática ha tener un nome/títulu que la identifique.

Va valorase positivamente incluyir dientro del programa d'actividaes la visita de "Aliatar" la xornada del 5 de xineru.

Nel desenvolvimientu del Campus de Navidá tamién se busca que tengan un pesu específicu actividaes y/o procesos de trabayu con aplicación en materia sostenible col oxetivu de concienciar y sensibilizar a los participantes dende edaes tempranes en valores como'l respetu, la preservación y la puesta en valor de los recursos culturales. Nel programa del Campus pídese la integración d'actividaes sostenibles en materia social, ambiental y cultural.

- Amás, con una frecuencia selmanal ha contemplase nel cronograma una actividá en **llingua asturiana**.

Común pa los dos Campus:

Tolos espacios escoyíos pa l'actividá han cumplir la llexislación vixente en materia de seguridad, la referida a prevención de riesgos llaborales y les midíes decretaes y vixentes en materia de seguridad y prevención del COVID-19.

Medios técnicos y humanos: Los profesionales o entidades han poner los medios técnicos (de los que nun disponga la sede) y humanos que seyan precisos pal desenvolvimientu de l'actividá, amás del material funxible.

Los/les monitores qu'impartan el Campus han tener conocimientos de los temes a desenvolver en cada sesión, con vinculación llaboral o mercantil cola empresa adjudicataria d'alguerdu cola llegalidá vixente. Va valorase positivamente que los monitores tengan formación en primeros auxilios y la disponibilidad de personal especializao en NEE.

Han disponer de **teléfonu móvil** de contactu tanto'l coordinador como el/la monitor/a que más horas de trabayu desempeñe nel centru.

5.- PRESENTACIÓN DE SOLICITÚES. FORMA DE PRESENTACIÓN.

La solicitú ha unviase per email al corréu eventos@turismoycultura.asturias.es

En presentándola, el/la solicitante va recibir acuse de recibu per corréu electrónicu.

La hora y fecha tope de presentación de les solicitúes van ser les **14:00 h del día 14 de marzu del 2022**.

Información qu'ha recoyer el proyectu que se presenta:

- De forma completa pero curtia hai que desenvolver el cronograma del conteníu de caúna de les sesiones y actividaes programaes, amás de pone-y un títulu a caúna de les selmanes temátiques d'actividá nel casu del Campus de Branu, y a caúna de les xornaes diaries d'actividá nel casu del Campus de Navidá.
- Hai qu'especificar númeru máximu de participantes por grupu, amás de la ratio de monitor por neñu/a. Igualmente hai qu'indicar si fai falta un númeru mínimu de participantes pa que salga p'alantre l'actividá.
**Los aforos han ser flexibles y axustase siempre a tenor de les condiciones sanitaries y les restricciones vixentes.*
- Hai qu'apurir información relativa a la **formación académica y esperiencia llaboral de los/les monitores** van tar a cargu de los grupos de neños/es del Campus.
- Hai qu'especificar el **PVP** de l'actividá (tanto pa Branu como Navidá) pa los asistentes, amás de les variables mentaes anteriormente. Han contemplase precios generales y precios más ventayosos pa los nuestros socios del **Club Cultura y carnet escolar**.
Amás, nel casu del Campus de Branu, ha ofrecese un descuentu pa los/les participantes **que compren 2 o más selmanes, o cuando compren entrada dos**

o más neños/es de la mesma unidá familiar (non acumulable a otros descuentos).

Nel casu del Campus de Navidá, ha ofrecese un descuentu a los y les participantes que compren **toles sesiones d'una mesma selmana** (avientu / xineru). Non acumulable a otros descuentos.

- Ye menester una descripción pormenorizada de les **necesidaes técniques** (non apurrís pola entidá que concurre a la convocatoria)
- Semeya/es ilustrativa/es del proyectu.

6.- VALORACIÓN DE LOS PROYECTOS Y AXUDICACIÓN

Van poder pidise a los/as interesao/es toles aclaraciones, información o documentación complementario que seya menester pa valorar correctamente los proyectos.

La resolución va comunicase a los interesaos/es enantes del 1 de abril del 2022 y va publicase na web de Llaboral: www.laboralciudaddelacultura.com amás de na web d'Asturies Cultura en Rede: www.asturiesculturaenrede.es

Criterios de valoración. Les propuestes presentaes van calificase como “Seleccionada” y “Non seleccionada”, valorando la so adecuación a estos criterios:

- La calidá, orixinalidá y calter novedosu del proyectu. Ha tenese en consideración el grau d'ellaboración, detalle y concreción de la propuesta, amás de la capacidá d'adaptase en casu de cambeos de les midíes restrictives vixentes pa la contención del COVID-19.

- El facer el númeru mayor posible d'actividades al aire llibre

- L'incluyir nel programa actividaes n'inglés

- La programación d'actividaes rellacionaes con tecnoloxíes nueves

- El procuru especial y fomentu, al traviés de les actividaes programaes, de la educación emocional, social y en valores.

- Va tenese una consideración especial con aquelles propuestes que fomenten la igualdá y la diversidá, qu'usen un llinguaxe inclusivu, que promuevan una mayor visibilidá de la muyer, y/o que propongan discursos dende la identidá de xéneru.

- La esperiencia y trayectoria de los profesionales y entidaes nel desenvolvimientu d'estes actividaes, igual que la formación de los monitores que van atender a los grupos del campamentu.
- La ufierta d'un serviciu de madrugadores, con entrada anticipada pa los participantes que lo quieran/precisen
- La propuesta detallada d'organización de les comíes pa los participantes a xornada completa (nel casu del Campus de Branu)
- L'adequación y especialización del Campus a neños/es con necesidaes especiales, si se diere'l casu
- L'adequación del PVP al númberu de profesionales involucraos (ratio monitor/menores) y los medios técnicos y material funxible que s'aporten.
- La minuciosidá de los protocolos y plan de continxencia pa la prevención del COVID-19

En valorándose tolos proyectos, va publicase cuál foi l'axudicatariu.

7.- FORMALIZACIÓN DEL CONTRATU.

N'axudicándose'l proyectu a la entidá seleccionada, han formalizase los contratos correspondientes (contratu LOPD y contratu d'actividá). El plazu pa la formalización d'estos contratos ha ser siempre de, polo menos, 7 días primero de la fecha d'empiezu de l'actividá. El trescursu d'esi plazu ensin que se llegue a formalizar el contratu por causes imputables al solicitante ha provocar la caducidá de la solicitú, la perda de los derechos que pudieren corresponde-y y la esclusión del proyectu.

8.- OBLIGACIONES DE LA ENTIDÁ SELECCIONADA.

Nel casu de salir escoyida la so propuesta, l'axudicatariu comprométese a:

- Llevar a cabu'l proyectu nes feches, hores y términos alcordaos.

- Poner a disposición de la SPXP los materiales gráficos y audiovisuales al so algame pa facilitar la promoción y difusión del campus.
- Difundir al traviés de los sos medios información sobre l'actividá (web, redes sociales, mailing, etc.) y colaborar cola SPXP na atención a los medios de comunicación en casu de que seya menester.
- Aceptar l'usu del nome del profesional, asociación y/o empresa p'acciones promocionales o de comunicación del proyectu.
- Presentar el protocolu y plan de continxencia pa la prevención COVID-19.
- Presentar la documentación que resulte d'aplicación según la llexislación vixente en materia de seguridad llaboral y prevención de riesgos llaborales.

9. - ACEPTACION DE LES BASES

La presentación d'un proyectu a esta convocatoria supón l'aceptación automática y completa d'estes bases.